




KATILINGBAN

Ang opisyal nga pamantalaan sa Basic Ecclesial Communities (BEC) sa parokya sa Naval

Vol 3, No. 3

website: www.geocities.com/navalbec

October 2006



Most Rev. Filomeno G. Bactol, D.D.

Mensaje

Kinsa ba ang usa ka inahan? Unsa ba ang Eukaristiya?

Dili malalis nga kitang tanan adunay inahan. Dili usab malalis nga ang atong kinabuhi namugna sulod sa sabakan sa

atong inahan. Mao diay nga kung mokugos ang usa ka inahan sa iyang anak iya gayud kining sapnayon sa iyang mga bukton ug ipaduol sa iyang dughan kay sa gugma man diay kita namugna. Ang gugma sa inahan malungtaron, mapailubon, ug maalagaron kay alang kaniya walay bili ang gugma kung kini dili magmalungtaron, magmapailubon, ug maalagaron sa kinabuhi.

Mao kana ang atong Mahal nga Inahan sa Rosaryo. Inahan siya sa Gugma, Inahan siya sa Kinabuhi. Ug ang duha, Gugma ug Kinabuhi, magakuyog gayud ug dili mahimong pagabulagon.

Nan, mao kini ang grasya sa Eukaristiya. Ang Eukaristiya mao ang Lawas ug Dugo ni Kristo nga Iyang giula alang kanato aron makabaton kita ug kinabuhi, ug kining kinabuhia gihatag kanato sa atong Inahan, ang Mahal nga Birhen. Kay dili ba gisabak niya sulod sa iyang sabakan ang Eukaristiya, si Hesus nga atong Ginoo? Kay dili ba mahimong tabernakulo ang tiyan ni Maria tungod sa Eukaristiya nga nabuhi dinhi?

Gugma ug Kinabuhi. Maria ug Eukaristiya. Ang duha dili mahimong pagabulagon kay sila naghatag sa kinabuhi ug grasya.

Sa atong pagsaulog karong Oktubre 1, 2006 sa kapistahan sa Mahal nga Inahan sa Santos nga Pagrosaryo ug sa pagsaulog nato sa Oktubre isip Bulan sa Rosaryo, gihumduman nato ug gipasalamatan ang dakong gasa sa kinabuhi nga namugna gikan sa gugma sa usa ka inahan tungod sa kabubut-on sa Dios. Magmabungahon unta ang atong kapistahan pinaagi sa atong pagdangop sa atong inahan ug paggakos kaniya ug sa kinabuhi nga iyang gasa kanato. Magmaalagaron unta kita niining maong kinabuhi pinasubay sa atong inahan ug nga isalikway unta nato ang bisan unsa mga magdaut niini.

Maayong Fiesta kanatong tanan!

Bishop FILOMENO G. BACTOL, D.D.
ug mga Kaparian sa Naval



PAMALANDONG SA

EBANGHELYO

October 1, 2006 – Ika-26 nga Domingo “Sulod sa Tuig”
Basahon: Nm.11:25-29/Jas.5:1-6/Mk. 9:38-43, 45, 47-48

Human sa pagbasa sa Ebanghelyo:

Unsa man nga pulong o mga pulong sa Ebanghelyo ang nakapatandog kanimo? Ngano man?

Tema: (Basahon human sa mga paambit)

Ang tinuod nga paagi sa pagka- Cristiyano gihulagway diha sa gilansang nga Cristo. Sa iyang pagdupa didto sa krus, giukab ni Hesus ang iyang kaugalingon ngadto sa tanang katawhan. Busa ang pagka-masinabtanon ug pagkamadawaton maoy mga hiyas nga nagtimaan sa tinun-an ni Cristo.

Sa unang pagbasa si Josue napakyas pag-ila sa propetanhong gasa niadtog duruha ka tawo nga wala moadto sa Tolda nga Tagboanan, hinuon nagsugod sa pagpanagna. Sa ebanghelyo, si Juan usab wala makasabot nga mahimo diay nga manghingilin og nga yawa ang usa ka tawo bisag dili siya sakop sa Napulog-duha.

Sagad god ato mang isipon nga mga nahasakop lamang sa ginganlan natog “Simbahan”, ilabi na ang naghupot og katungdanan niini, maoy nakaangkon sa Espiritu ni Hesus. Ang ebanghelyo niining Domingoha maoy misupak niining panghunahuna. Walay si bisan kinsa ang makahako-hako sa Espiritu Santo. Gawasnon ang Espiritu sa Dios ug dili kita makapugong kon kinsay buot niyang lamdagan.

Mao nga daghan ang gigasahan sa Espiritu sa Santo bisan ubos lang siya nga mga sakop sa Simbahan, bisan gani sila nga may yano apan madasigong pagtuo. Ang pangutana: Maka dawat ka ba kanila sa ilang pagkaginasahan sa Espiritu Santo?

Pamalandongi kini:

1. Kanus-a man ang katapusang higayon nga ikaw misabot ug midawat sa isigkatawo ilabina sila nga lisod kaayong sabton ug dawaton?

2. Unsa may imong reaksiyon sa pagkakita nimo sa uban nga gigasahan sa Espiritu sa Dios? Nagpasalamat ug nagdayeg ka ba Kaniya tungod sa iyang kamanggihatagon? O dili ba, nasina ka hinuon tungod kay gigasahan siya ug dili ikaw?

October 8, 2006: Ika-27 nga Domingo “Sulod sa Tuig”
 Basahon : Gn. 2:18-24 / Heb. 2:9-11 / **Mk. 10:2-16**

Human sa pagbasa sa Ebanghelyo:

Unsa man nga pulong o mga pulong sa Ebanghelyo ang nakapatandog kanimo? Ngano man?

Tema: (Basahon human sa mga paambit)

Sa ebanghelyo karong adlaw, si Hesus gisulayan na usab pagbitik sa mga Pariseo pinaagi sa makuting pagtuki sa Balaod. Gitubag niya kini pinaagi sa pagbatbat mahitungod sa matuod nga kinaiya sa kaminyoon, dili ang unsay giingon sa balaod mahitungod niini. Gikan sa basahon sa Genesis mikutlo siyag duruha ka mga yugto nga naghigot og pagmugna sa tawo. Ang una nagsaysay nga “ ang Dios nagmugna sa tawo sumala sa iyang larawan; lalaki ug babaye gimugna niya sila” (Gen. 1:6-27). Kini nagmatuod sa kahiusahan sa lalaki ug babaye diha sa ilang kasamahan sa Dios. “Ania ra gayod ang sama kanako – bukog gikan sa akong bukog ug unod gikan sa akong unod . . Tungod niini ang lalaki mobiya sa iyang amahan ug inahan ug

motipon sa iyang asawa ug mausa sila” (Gen.2:23-24). Mao kini ang ikaduha nga nagpadayag nga ang babaye mao gayod ang angayang kapikas sa lalaki ug ang gasa sa Dios alang kaniya. Ang paghulagway nga ang babaye gilalang gikan sa bukog sa lalaki nagpasabot lang sa kahiusahan tali sa lalaki ug babaye, kahiusahan nga nagagikan sa ilang paghigugmaay sa usag-usa.

Ang gugma sa Dios alang sa iyang katawhan gilarawan sa mga propeta nagsama sa gugma sa usa ka bana alang sa iyang lungsod, ang Israel. Bisan sa mga panahon anus-a mibudhi ang iyang katawhan kaniya, siya nagpabiling makanunayon kanila. Gitawag niya sila pagbalik ug gibag-o niya ang iyang pagsagop kanila (Os. 2:21-22)

Kining talikala sa kaminyoon nagtimailhan usab sa gugma ni Cristo alang sa iyang Simbahan (Ef. 5:25-32). Gihigugma niya kini ingon nga iyang kaugalingong lawas. Ang Simbahan sa iyang bahin nag-andam alang kaniya ug nagpaabot sa iyang adlaw kanus-a mobalik si Cristo pagdala kaniya isip pangasaw-onon ngadto sa bangkita sa kasal didto sa gingharian (Gipa. 21:1-2).

Pamalandongi kini:

1. Kon ang Dios migamit sa tawhanong kasinatian sa gugma tali sa bana ug asawa aron pagpadayag kon unsa kadako ang iyang gugma alang sa iyang katawhan, kini nagpasabot lang sa iyang paghatag ug bili sa kaminyoon. Ikaw bana, ikaw asawa, naghatag ba usab sa ingon nga bili sa inyong panagtiayon?
2. Kumusta naman ang imong paghigugma sa Simbahan?



KATILINGBAN
 Ang sagol nga mensahe sa Dios: Ewanghelyo, Komunyon, ug panagyo sa Dios

TEAM MINISTRY

Team Moderator: Bishop Filomeno G. Bactol, D.D.

Team Members:

- Fr. Marvyn A. Maceda
- Fr. Florencio Gerones
- Fr. Kenneth Hendricks
- Fr. Cornelio Amante, Jr.

Newsletter Moderator:

Fr. Marvyn A. Maceda

Encoder:

Vinna Sabroso

Computer Specialist

Oscar O. Borrinaga

Business Managers:

- Rizalito V. Curso
- Conchita Calvez

PARISH FORMATION TEAM

- | | |
|------------------|--------------------|
| Eudoxia Canonoy | Reymund Icaín |
| Linda Roldan | Jonnel Quilaneta |
| Necitas Casado | Alfredo Olaer |
| Catalina Machete | Alfredo Paghubasan |
| Sonia Pitao | Danny Jayubo |
| Josephine Romero | Gualberto Tonelete |
| | Ramises Bongabong |
| | Jorge Manco |
| | Buddy Castro |

October 15, 2006: Ika-28 nga Domingo "Sulod Sa Tuig"
 Basahon: Wis. 7:7-11 / Heb. 4:12-13 / **Mk. 10:17-30**

Human sa pagbasa sa Ebanghelyo:

Unsa man nga pulong o mga pulong sa Ebanghelyo ang nakapatandog kanimo? Ngano man?

Tema: (Basahon human sa mga paambit)

“Maayong Magtutudlo, unsa may kinahanglan kong buhaton aron madawat ko ang kinabuhing dayon? (Marcos 10:17). Kining maong pangutana sa wala hiilhing tawo nagtug-an sa walay kinutobang pangandoy sa tawo nga mabuhi. Gipangutana niya ang unsay gitinguha sa matag tawo, sa tanang panahon ug tanang dapit.

Nataligam-an sa tawo nga ang kinabuhing dayon maoy bunga sa usa ka mahiyasong pagkinabuhi dinhi sa yuta. Tungod kay nagtuman man siya sa mga kasugoan, napaniguro niya nga hayan maluwas gayod siya. Apan aduna pay kakulangan kining tawhana. Wala pa niya mahupti ang kinatibuk-an. Wala kitay nahatag sa Dios kon dili kita andam sa paghatag ngadto kaniya gayod. Ang gugma ni Cristo maoy nagtawag kanato ngadto sa Dios sa hinurot gayod nga nagtahan ug kini masuta diha sa tawag, “Dali ug sunod kanako” (Marcos 10:21). Dili baya ni pangutana sa pagbuhat unsay matarong ni sa pagpuyog higpit nga kinabuhi. Hinoon pangutana kini sa panaad ngadto kang Hesus. Dili na pangutana ang pagbuhat ug daghan, ni ang pag-ila kon unsay gilagda gikan sa unsay gitambag. Ang pagsunod kang Cristo nagkahulugan sa tanan gayod, sa imong bahandi o sa imong kinabuhi.

Pamalandongi kini:

Sa imong pagsunod kang Cristo diha sa bisan unsang tawag sa kinabuhi, imo bang nahatag ang tanan, ang kinatibuk-an? Sama nga ang Dios mitanyag kanimo sa tanan, ikaw andam ba usab nga motahan sa tanan ngadto kaniya?

“Higugmaa ang inyong mga kaaway, ug pag-ampo kamo alang sa mga tawo nga nagpasipala kaninyo.”

Mateo 5:44

October 22, 2006: Ika-29 nga Domingo "Sulod Sa Tuig"
 Basahon : Is. 53:10-11 / Heb. 4:14-16 / **Mk. 10:35-45**

Human sa pagbasa sa Ebanghelyo:

Unsa man nga pulong o mga pulong sa Ebanghelyo ang nakapatandog kanimo? Ngano man?

Tema: (Basahon human sa mga paambit)

Dili pa lang gayod dugay nga sa ikatulong higayon naghigot si Hesus ngadto sa iyang mga tinun-an mahitungod sa iyang pag-adto sa Herusalem aron mag-antus ug mamatay. Ang hulga sa kalisdanan ug kamatayon wala panumbalinga sa managsuong si Santiago ug Juan; hinoon napunting ang ilang pagtan-aw ngadto sa gisaad nga himaya nga maoy pagasangputan nila. Ambisyon maoy nagahari kanila. Miangkon ang mga anak ni Sebedeo sa labing maayong luna didto sa umaabot nga gingharian.

Wala gitaho ni San Marcos nga ang ubang mga tinun-an misalmot niining panaghigot. Apan mabasa nato nga sila usab didto sa dalan paingon sa Capernaum nanaglantugi kon kinsa ang labing dako kanila? (Marcos 9:33-37). Daw napaniguro nila nga naghupot sila sa mga katakus aron maangkon nila ang himaya sa ilang Magtutudlo inigbalik niya nga mahimayaon.

Gipasaligan sila ni Hesus nga makasulod sila uban kaniya ngadto sa kahimayaan apan dili sigun sa ilang gihunahuna. Ang ilang pag-isip nga sila labing dako dili maoy maghatod kanila ngadto sa ilang luna didto sa gingharian. Ang ilang pagkamakanunayon sa pagsunod sa pananglitan nga gihatag kanila sa ilang Magtutudlo maoy maghatod kanila ngadto sa ilang luna didto sa gingharian. “Siya nga wala moanhi aron alagaran, kondili aron pag-alagad ug paghatag sa iyang kinabuhi aron pagtubos sa daghang mga tawo” (Marcos 10:45). Sila lamang nga miambit sa iyang pag-alagad ug sa iyang pag-antus alang sa uban mao ray makaambit sa kadaugan sa iyang pagkabanhaw bisan pa niana, wala silay mahimo aron ankonon nila ang mga lingkuranan sa iyang tuo ug wala. Sa kaulahian, ang kaluwasan sa tanan gasa gikan sa Dios kay Siya ang nagtanyag kanato sa gasa sa paglahutay panahon sa kalisod ug sa ganti niini.

Wala baya mosaway si Hesus sa tawhanong ambisyon. Hinoon iya kining gidala balik sa hustong tumong. Kinahanglan ang iyang mga tinun-an dili magtinguha sa himaya kondili ang pag-alagad tungod ug alang sa kadaghanan kay mao kini ang maghimo kanilang takus sa kahimayaan.

Pamalandongi kini:

Siya nga Magtutudlo nagmaalagaron. Ikaw nga iyang sumusunod nagmaalagaron ba usab? Hinumdumi nga kini maoy maghatod nimo ngadto sa kahimayaan sa imong Magtutudlo.

Oct. 29, 2006: Ika-30 nga Domingo "Sulod Sa Tuig"
Basahon : Jer. 31:7-9 / Heb. 5:1-6 / **Mk. 10:46-52**

Human sa pagbasa sa Ebanghelyo:

Unsa man nga pulong o mga pulong sa Ebanghelyo ang nakapatandog kanimo? Ngano man?

Tema: (Basahon human sa mga paambit)

Niining Domingoha si San Marcos nagtaho sa pagkamaayo ni Bartimeo. Gitaho kini niya ngadto sa Kristuhanong katilingban nga nagpanuko sa pagsunod kang Hesus subay sa dalan sa iyang pagpasakit. Dakong binali kining hitaboa. Ang pagkabuta niining makililimos nga nagalingkod daplin sa dalan wala maghikaw kaniya sa pagbutyag kon kinsa si Hesus, labaw pa sa nabatyagan sa panon sa katawhan nga didto niadtong tungora. Gipakita niya ang iyang dakong pag-ila kang Hesus pinaagi sa paglumpayat kaniya nga nagtawag niya. Ug giayo siya niya.

Ang katataw sa mga mata sa atong pagtuo dili lang magluwas kondili maghatod usab kini kanato ngadto sa atong kausaban diha kang Cristo. Sa dihang naayo si Bartimeo, ang larawan sa makanunayong katilingban ug panig-ingnan sa hingpit nga tinun-an, misugod siya pagsunod kang Hesus subay sa kadalanan.

Si Bartimeo, simbolo alang "kanila nga nanagpuyo sa kangitngit ug sa landong sa kamatayon" (Lucas 1:79), karon nahimong sumbanan alang kanila nga nagtuwaw, nga nag-ampo nga luwason sa ilang pagkabuta, aron magalakaw sila diha sa dalan sa kalinaw.

Tinabangan sa anak ni David, kita usab mag-ambahan uban kanila nga nagtuo, kanila nga nag-ampo, kanila nga nakakita.

Pamalandongi kini:

Ikaw buta ba usab sa pagbatyag kang Hesus nga anaa sa imong kaugalingon, nga naa sa imong isigkatawo ug naa sa hitabo sa imong kinabuhi? Unsa man ka klaro ang imong mga mata sa pagtuo?

BEC Activities

PAROCHIAL FELLOWSHIP

October 1, 2006
General Parochial Fellowship
Cathedral Church
7:30 AM. - 4:00PM.

CLUSTER FELLOWSHIP

October 7, 2006
Cathedral Church
7:30 pm. - 10:00 pm.

BEC ANNIVERSARY

October 2, 2006
BEC Smo. Rosario - Zone 2

October 7, 2006
BEC Sitio Ilawod, Caraycaray

October 24, 2006
BEC Brgy. Cabungaan

October 25, 2006
BEC Upper Bigaa

October 27, 2006
BEC Lower Calumpang

October 29, 2006
BEC Lower Ilaya
&
BEC Smo. Rosario - Zone 4

LJC Rice Mill

Sitio Lupa, Calumpang

& Groceries

Ground Floor, Naval Mall

Owned & Managed by:

RAMISES "Bong" BONGABONG